



EM 2015 / 25.1

15. oktober 2015

Naaaja H. Nathanielsen

CPR-imut inatsisip allannguutaanut Kunngip peqqussutaata Kalaallit Nunaannut atuutitinneqarnissaanik peqqussut pillugu Naalakkersuisut oqaaseqaateqarnissaat pillugu Inatsisartut aalajangiiffigisassaatusiunnersuut.

(Aningaasaqarnermut Aatsitassanullu Naalakkersuisoq)

Nakuuserneq inuiaqatigiinni ajornartorsiutitta annersaannut ilaavoq. Ima nakuusertoqartartigivoq allaat nalinginnaasunngorsimalluni. Tamakkerluta peroriartornitsinni nakuusernermik takusaqarsimavugut. Angerlarsimaffinni imaluunniit illoqarfimmi. Tamannalu inuiaqatigiinni alianartuuvoq.

Allaangilaq oqaaseq taanna sungiutiinnarsimagipput. Eqqaamasariaqarparpulli nakuusernermi inuk isimmittarneqartarmat, tilluarneqartarmat imaluunniit arlaannik sakkulerluni, soorlu puiaasanik ujaqqanilluunniit annersarneqartarmat. Aamma qimitseriartoqartarpoq imaluunniit savimmik aallaammilluunniit sakkoqartoqartarluni. Imaaginnangilarlu timikkut annersarneqarnerusoq. Aamma anersaakkut anniartitsisoqartarpoq, inuk nakkarsarneqarluni, illaruaatigineqarluni, sioorasaarneqarluni, nikanarsarneqarluni nakkutigineqarlunilu. Atoqatigiinnikkut nakuuserfigitinnermi inuk piumanngitsoq atoqatigineqartarpoq. Aningaasatigut atornerlunneqarnermi imaluunniit pigisatigut innarligaanermi aningaasaatinik arsaartorfigitittoqartarpoq angerlarsimaffimmilu pigisanik aserorteriffigitittoqartarluni: atisat, assit, pequtit. Iliuutsit taamaattut inuiaqatigiinni piuartillugit ilumut akueriinnarsinnaanerpagut?

Inuiaqatigiinni nakuusertoqartaqaaq. Taamaattumillu nakuuserfigitittut soorunami illersorusuppavut. Siunnersuummi inunnut ulorianartorsiortunut najukkanik illersuisinnaaneq pineqarpoq. Uanilu danskit inatsisaata nunatsinni atortuulersinneqarnissaa pineqarpoq. Inuit Ataqatigiinniit nakuuserfigitittut

illersorniarneqarnerat pineqartillugu siunnersuut taamaattoq akerlerisinnaangilarput. Taamaattorli siunnersuummut arlalinnik oqaasissaqarpugut.

Tusarniaatitsinermi akissutit paasissutissani tigusatsinni ilaangillat. Taamaattumillu kommunit siunnersuummut tunngatillugu aperineqarsimanersut, taamatullu innuttaasut najugaqarfiisa isertugaanissaannut tunngatillugu suliamik qanoq naammassinnissanerlutik eqqarsaatersorsimanersut ataatsimiititaliamiit eqqarsaatigeqquarput. Apeqqullu tamanna nakuuserfigitittup ikiorsiissutinik pisariaqartitsiguni pinissaani adresseqartussaannermik piumasaqaat eqqarsaatigalugu apeqqutaalissaaq.

Nunarput angeqaaq, innuttaasullu ikeqaagut. Taamaattumillu siunertaq pitsaasuvoq, piviusorli eqqarsaatigalugu malinneqarnissaa ajornakusoorsinnaalluni. Nunatsinni inuup toqqorsimanissaata ajornakusoortuunera ilimagineqarsinnaavoq. Pingaartumik qitornaqaraanni atuartussamik imaluunniit meeqqerivimmiittussamik. Taamaattumillu nakuusertuusup nakuuserfigitittup sumiinneranik arlaatigut paasisaqarnissaa naatsorsuutigisinnaavarput. Tamannalu pillugu inatsimmut siunnersuutip matuma ilaneqarnissaa suli pingaarnulerpoq, tassa nakuusernermik pinaveersimatitsinermik nakuusertunullu katsorsaasoqarsinnaanngorlugu iliuuseqartoqarnissaa eqqarsaatigalugu.

Tassunga atatillugu 2010-mi ukiakkut ataatsimiinnermi Inuit Ataqatigiinniit siunnersuuterput eqqaasitsissutigissavarput. Imm. 37-ip ataani angutinut arnanullu nakuusertartunut katsorsartinnissamut neqerooruteqalernissaanik siunnersuuteqarpugut. Siunnersuullu Inatsisartunit isumaqatigiittunit akuerineqarpoq.

Taamatut oqaaseqarluta siunnersuutip Inatsisinut Ataatsimiititaliamit suliarineqarnissaa innersuutigissavarput.